

**Naalakkersuisut Kommune Qeqertalimmi aamma Avannaata Kommuniani campusimik pilersitsinissaq siunertaralugu suliniutit suut aallartinneqassanersut misissueqqullugit peqquneqarnissaannik Inatsisartut aalajangiiffigisassatut siunnersuut. Misissuinermi ilaatigut qulaajarneqassapput, Aasianni GUX-ip pitsaassusaanut aammalu tiguneqarnissamut toqqammavigisat allannguutaanngitsumik, Ilulissani GUX-imik pilersitsinissamut suliniutit pisariaqartut. Misissuineq juli 2022 naatinnagu saqqummiunneqassaaq.**

(Inatsisartuni ilaasortaq Doris Jakobsen Jensen, Siumut)

### **Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

### **Siullermeerinnineq**

Naalakkersuisut qujassutigaa Inatsisartuni ilaasortap Doris Jakobsen Jensen-ip, Siumut, Inatsisartunut aalajangiiffigisassatut siunnersuutaa.

Naalakkersuisut siunnersuut paasisinnaavaat, kisiannili isumaqatiginagu siunnersuutigineqartutut misissuisoqarnissaa.

Piffissami matumani aammalu piffissap ingerlanerani inatsisit assigiinngitsut Naalakkersuisunik periarfissaqartitsisarput ilinniartitaanernik pilersitsisarnernut atorunnaarsitsisarnernullu.

Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaanni nr. 10, 19. maj 2010-meersumi § 5 naapertorlugu Naalakkersuisut ilinniartitaanernik nutaanik pilersitsisinnaallutillu pioreersunik atorunnaarsitsisinnaapput. § 28, imm. 2 naapertorlugu Naalakkersuisut qitiusumik ilinniartinni ilinniarnertuunngorniarluni ilinniartitaanernik pilersitsinissamik akuersisinnaapput.

Qaffasinnerusumik ilinniartitaanerit pillugit Inatsisartut inatsisaanni nr. 14, 12. juni 2019-meersumi § 3, imm. 2 naapertorlugu Qitiusumik ilinniartit aamma inuussutissarsiutinut ilinniartit ilinniartitaanernillu ingerlatsiviit allat Naalakkersuisunit akuersissuteqarnikkut qaffasinnerusumik ilinniartitaanernik neqerooruteqarsinnaapput. Tamanna pisinnaavoq ilinniartitaanerit ilinniartit suliassaqarfiata iluanut tunngasuussapput.

Ilinniarnertuunngorniartarneq pillugu Inatsisartut inatsisaanni nr. 13, 22. november 2011-meersumi § 4 naapertorlugu ilinniarnertuunngorniarluni ilinniartitaanerit neqeroorutigineqarsinnaapput ilinniartitaanernik ingerlatsivinni Naalakkersuisunit akuersisaasuni imaluunniit tamatumunna pilersitaasuni.

Inatsisit atuuttut tunuliaqutaralugit taamaasilluni nunatsinni ilinniartitaanernik ingerlatsivinnik assigiinngitsunik pilersitsisoqartarsimavoq, campus-eqarfiulersartunik, tassalu CAK kiisalu KTI.

Oqaaseq "suleqatigiinneq" campus-eqalersarnerani qitiuvoq.

Campus tassaavoq suleqatigeeriaaseq ilinniartitaanernik ingerlatsiviit akornanni, amerlasuutigullu suleqatigiinnikkut ineriartitaqarnerulerneq pilersinneqartarluni.

Naalakkersuisut isumaqarput oqaluuserineqarsinnaanngitsoq misissuinissaq “iliuusissanik pisariaqartunik pilersitsinissaq” campus-imik pilersitsinissamik siunnerfeqartumik kommunimi, campus-imik pilersitsinissaq pilersaarusiorneqartanngimmat pilersitsisoqartaranilu, kisianni pilertarluni kommunini ingerlatsiviit pioreersut suleqatigiillutik peqatigiinnerisigut.

Aalajangersimasumik oqaasertalersuuteqanngilaq campus-ip qanoq isikkoqarnissaanut, aammalu suleqatigiinnerit qanoq ittuunissaannut.

Oqaatigineqassaaq aamma qularnaarneqarsinnaanngitsoq ilinniartitaanernik ingerlatsiviit assigiinngitsut akornanni campus-imik pilersisoqarnissaa sumiiffimmi ataatsimi, suleqatigiinnissaq isumaqatigiissutaasimanngippat.

Naalakkersuisut erseqqissaatiginiarpaat naak GUX-imik Ilulissani pilersitsisoqarnissaa siunnerfiunngikkaluartoq, suli pingaartillugu ilaammat Ilulissani ilinniartitaanerit tungaasigut ineriartortitsisoqarnissaa.

Taamaattumik Perorsaanermik Ilinniarfik suli ilinniartitaanernik nutaanik inuiaqatigiinnullu sammisunik ineriartortitsiniarpoq , silaannaap pissusaanut sammisunik ilinniartitaanermik Ilulissani pilersitsinissamik suli at saniatigut.

Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaanni nr. 10, 19. maj 2010-meersumi § 4 naapertorlugu Ilinniartitaanermut Naalakkersuisoq periarfissaqarpoq siunnersuisoqatigiinnik aamma ataatsimiititalianik pilersitsisinnaanermut, inuussutissarsiutinut tunngasunik ilinniartitaanernut sammisunik suliaqartussanik, tamatumunngalu atatillugu suliffeqarnikkut inuussutissarsiornikkullu ineriartortitsinerit atasunik.

Periarfissaq taanna atorneqarsinnaavoq periarfissaasinnaasunik misissuinerni, PS/SPS-ip Ilulissani ilinniartitaanernik neqeroorutaasa annertusineqarsinnaanerit eqqarsaatigalugu.

Naalakkersuisut siuliani oqaatigineqartut tunngavigalugit inassutigissavaat aalajangiiffigisassatut siunnersuut itigartinneqassasoq.